

四庫全書

史部

欽定四庫全書

史部
明史卷二十八
九

內閣中書臣瞿照覆勘

總校官編修臣朱鈴

欽定四庫全書

明史卷二十八

大學士張廷玉等奉 敕修

志第四

五行一

水

史志五行始自漢書詳錄五行傳說及其占應後代作
史者因之粵稽洪範首叙五行以其為天地萬物之所
莫能外而合諸人道則有五事稽諸天道則有庶徵天

人相感以類而應者固不得謂理之所無而傳說則條
分縷析以某異為某事之應更旁引曲證以伸其說故
雖父子師弟不能無所抵牾則果有當於叙疇之意歟
夫苟知天人之應捷於影響庶幾一言一動皆有所警
惕以此垂戒意非不善然天道遠人道邇遇事而比之
必有驗有不驗至有不驗則見以為無徵而怠焉前賢
之論此悉矣孔子作春秋紀異而說不書彼劉董諸儒
之學頗近於術數機祥本無足述班氏創立此志不得

不詳其學之本原而歷代之史往往取前人數見之說
備列簡端揆之義法未知所處故考次洪武以來略依
舊史五行之例著其祥異而事應暨舊說之前見者並
削而不載云

洪範曰水曰潤下水不潤下則失其性矣前史多以恒
寒恒陰雪霜水雹雷震魚孽蝗蝻豕禍龍蛇之孽馬異
人疴疾疫鼓妖隕石水潦水變黑昔黑祥皆屬之水今
從之

恒寒景泰四年冬十一月戊辰至明年孟春山東河南
浙江直隸淮徐大雪數尺淮東之海水四十餘里人畜
凍死萬計五年正月江南諸府大雪連四旬蘇常凍餓
死者無算是春羅山大寒竹樹魚蚌皆死衡州雨雪連
綿傷人甚多牛畜凍死三萬六千蹄成化十三年四月
壬戌開原大雨雪畜多凍死十六年七八月越嵩雨雪
交作寒氣若冬弘治六年十一月鄭陽大雪至十二月
壬戌夜雷電大作明日復震後五日雪止平地三尺餘

人畜多凍死正德元年四月雲南武定隕霜殺麥寒如
冬萬曆五年六月蘇松連雨寒如冬傷稼四十六年四
月辛亥陝西大雨雪羸橐駝凍死二千蹄

恒陰洪武十八年二月久陰正統五年七月戊午己未
及癸亥曉刻陰沉四方濃霧不辨人八年邛海二州陰
霧彌月夏麥多損景泰六年正月癸酉陰霧四塞既而
成霜附木凡五日八年正月甲子陰晦大霧咫尺不辨
人物成化四年三月昏霧蔽天不見星日者累晝夜九

年三月甲午四月丁卯山東暗黑如夜二十年五月丙申番禺天晦良久乃復二十三年十二月辛卯大霧不辨人弘治十五年十一月景東晝晦者七日十六年四月辛亥甘肅昏霧障天咫尺不辨人物十八年秋廣昌大雨霧凡兩月民病且死者相繼正德十年四月鉅野陰霧六日殺穀十四年三月戊午陰晦嘉靖元年正月丁卯日午昏霧四塞三年江北昏霧其氣如藥天啟六年閏五月丙戌霧重如雨六月己未如之

雨雪隕霜洪武十四年五月丁未建德雪六月己卯杭
州晴日飛雪二十六年四月丙申榆社隕霜損麥景泰
四年鳳陽八衛二三月雨雪不止傷麥天順四年三月
乙酉大雪越月乃止成化二年四月乙巳宣府隕霜殺
青苗十九年三月辛酉陝西隕霜弘治六年十月南京
雨雪連旬八年四月庚申榆社陵川襄垣長子沁源隕
霜殺麥豆桑辛酉慶陽諸府縣衛所三十五隕霜殺麥
豆禾苗九年四月辛巳榆次隕霜殺禾是月武鄉亦隕

霜十七年二月壬寅鄖陽均州雨雪雹雪片大者六寸
六月癸亥雨雪正德八年四月乙巳交登萊陽隕霜殺
稼丙辰殺穀十三年三月壬戌遼東隕霜禾苗皆死嘉
靖二年三月甲子郟城隕霜殺麥辛未殺禾二十二年
四月己亥固原隕霜殺麥隆慶六年三月丁亥南宮隕
霜殺麥萬曆二十四年四月己亥林縣雪二十六年十
一月辛亥彰德隕霜不殺草三十八年四月壬寅貴州
暴雪形如土磚民居片瓦無存者四十四年正月雨紅

黃黑三色雪屋上多巨人跡崇禎六年正月辛亥大雪
深二丈餘十一年五月戊寅喜峯口雪三尺十三年四
月會寧隕霜殺稼十六年四月鄆陵隕霜殺麥

冰雹洪武二年六月庚寅慶陽大雨雹傷禾苗三年五
月丙辰蔚州大雨雹傷田苗五年五月癸丑夜中都皇
城萬歲山雨冰雹大如彈丸七年八月甲午平涼延安
綏德米脂雨雹九月甲子鞏昌雨雹八年四月臨洮平
涼河州雹傷麥十四年七月己酉臨洮大雨雹傷稼十

八年二月雨雹永樂七年秋保定浙東雨雹十二年四月河南一州八縣雨雹殺麥正統三年西延平慶臨鞏六府及秦河岷金四州自夏逮秋大雨雹四年五月壬戌京師大雨雹五年四月丁酉平涼諸府大雨雹傷人畜田禾六月壬申至丙子山西行都司及蔚州連日雨雹其深尺餘傷稼八月庚辰保定大雨雹深尺餘傷稼景泰五年六月庚寅易州大方等社雨雹甚大傷稼百二十五里人馬多擊死六年閏六月乙巳束鹿雨雹如

鷄子擊死鳥雀狐兔無算天順元年六月己亥雨雹大如鷄卵至地經時不化奉天門東吻牌摧毀八年五月丁巳雨雹成化元年四月庚寅雨雹大如卵損禾稼五月辛酉又大雨雹五年閏二月癸未瓊山雨雹大如斗八年七月丙午隴州雨雹大如鵝卵或如鷄子中有如牛者五長七八寸厚三四寸六日乃消九年五月丁巳雨雹如拳十三年春湖廣大雨冰雹牛死無算十九年六月乙亥潞州雨雹大者如椀二十年二月丙子清遠

雨雹大如拳丙戌大雷電復雨雹二十一年三月己丑
夜番禺南海風雷大作飛電交下壞民居萬餘死者千
餘人二十二年三月甲寅南陽雨雹大如鵝卵弘治元
年三月壬申夜融縣雨雹壞城樓垣及軍民屋舍死者
四人二年三月戊寅賓州雨雹如鷄子擊殺牧豎三人
壞廬舍禾稼庚辰貴州安莊衛大雷雨雪雹壞麥苗四
月辛卯洮州衛雨水雹水湧三丈四年三月癸卯裕汝
二州雨雹大者如牆杵積厚二十尺壞屋宇禾稼四月

已酉兆州衛雨電及冰塊水高三四大漫城郭漂房舍
田苗人畜多滄死五年四月乙丑莒沂二州安邱郯城
二縣雨電大如酒盃傷人畜禾稼六年八月乙巳長子
雨電大者如拳傷禾稼人有擊死者辛未雨電大如彈
丸平地壅積八年二月壬申永嘉暴風雨雨電大如鷄
卵小如彈積地尺餘白霧四起毀屋殺黍禽鳥多死三
月己亥桐城雨霧深五尺殺二麥己酉淮鳳州縣有暴
風雨電殺麥四月乙亥常州泗邳雨電深五寸殺麥及

菜丙子沂州雨雹大者如盤小者如盆人畜多擊死六月乙卯雨雹七月乙酉洮州衛雨冰雹殺禾暴水至人畜多溺死者丙戌甘肅西寧大雨雹殺禾及畜九年五月丙辰雨雹十年二月己卯江西新城雨冰雹民有凍死者三月丁卯北通州雨冰深一尺十三年八月戊子雨雹丙午又雨雹九月壬戌又雨雹十四年四月丁酉徐州清河桃源宿遷雨冰雹平地五寸夏麥盡爛五月乙亥登萊二府雨雹殺禾七月辛卯雨雹正德元年六

月戊辰宣府馬營堡大雨雹深二尺禾稼盡傷三年四月辛未涇州雨雹大如鷄卵壞廬菽麥麻四年五月甲午費縣大雨雹深一尺壞麥穀八年十月戊戌平陽太原沁汾諸屬邑大雨雹平地水深丈餘衝毀人畜廬舍十一年六月甲戌宣府大雨雹禾稼盡死九月丙申貴州大雨雹十二年五月己亥安肅大雨雹平地水深三尺傷禾民有擊死者十三年四月壬午衡州疾風迅雷雨雹大如鵝子稜利如刀碎屋斷樹木如剪嘉靖元年

四月甲申雲南左衛各屬雨雹大如鷄子禾苗房屋被傷者無算五月己未蓬溪雨暴大如鵝子傷亦如之二年五月丁丑大同前衛雨雹四年四月丁未大同衛雨雹五月戊子固安雨雹五年五月甲辰滿城雨雹六月丁巳大同縣雨冰雹俱大如鷄子丁卯萬全都司及宣府皆雨雹大者如甌深尺餘七月癸未南豐雨雹大如盜形如人面遂昌雨雹頃刻二尺大殺麻豆六年六月癸丑鎮番衛大雨雹殺傷三十餘人十四年三月辛巳

漢中雨雹隕霜殺麥四月庚子開封彰德雨雹殺麥十
八年五月壬辰慶都安肅河間雨冰雹大如拳平地五
寸人有死傷者二十八年三月庚寅臨清大冰雹損傷
舍禾苗六月丁卯延川雨雹如斗壞廬舍傷人畜三十
四年五月庚子鳳陽大冰雹壞民田舍三十六年三月
癸未沂州雨雹大如盂小如雞卵平地尺餘徑八十里
人畜傷損無算四十三年閏二月甲申雨雹四月庚寅
又雨雹隆慶元年七月辛巳紫荆關雨雹殺稼七十里

三年三月辛未平溪衛雨雹平地水湧三尺漂沒廬舍
四月己丑鄖陽縣雨雹平地水深三尺五月癸丑延綏
口北馬營堡雨雹殺稼七十里四年四月辛酉宣府大
同雨雹厚三尺餘大如卵禾苗盡傷五年四月戊午大
雨雹六年八月乙丑初定二州大雨雹傷損禾菽擊斃
三人萬歷元年五月辛巳雨雹四年四月丙午博興大
雨雹如拳如卵明日又如之擊死男婦五十餘人牛馬
無算禾麥毀盡兗州相繼損禾五月乙巳定襄雨雹大

者如卯未苗盡損九年八月庚子遼東等衛雨雹如雞
卵未盡傷十一年閏二月丁卯秦州寶應雨雹如雞子
殺飛鳥無算五月庚子大雨雹十三年五月乙酉宛平
大雨雹傷人畜十計十五年五月癸巳喜峯口大雨雹
如棗栗積尺餘田木瓜果盡傷十九年四月壬子雨雹
二十一年二月庚寅貴陽府大雨雹十月丙戌武進江
陰大水雹傷五穀二十三年五月乙酉臨邑雨雹盡作
男女鳥獸形二十五年八月壬戌風雹二十八年六月

山東大風電擊死人畜傷禾苗河南亦雨水電傷禾麥
三十年四月己未大雨電三十一年五月戊寅鳳陽皇
陵雨電七月丁丑大雨電三十四年七月丙戌又大雨
電平地水深三尺三十六年五月戊子雨電四十一年
七月丁卯宣府大雨電殺禾稼四十六年三月庚辰長
秦同安大雨電如斗如拳擊傷城郭廬舍壓死者二百
二十餘人十月壬午雲南雨電天啟二年四月壬辰大
雨電崇禎三年九月辛丑大雨電四年五月襄垣雨電

大如伏牛盈丈小如拳破人畜甚衆六月丙申大雨雹
七年四月壬戌常州鎮江雨雹傷麥八年七月己酉臨
縣大冰雹三日積二尺餘大如鵝卵傷稼十年四月乙
亥大雨雹閏四月癸丑武鄉沁源大雨雹最大者如象
次如牛十一年六月甲寅宣府乾石河山場雨雹擊殺
馬羸四十八匹九月順天雨雹十二年八月白水同官
雒南隴西諸邑十里雨雹半日乃止損傷田禾十六年
六月丁丑乾州雨雹大如牛小如斗毀傷牆屋擊斃人

畜

雷震洪武六年十一月戊申雷電交作十三年五月甲午雷震謹身殿六月丙寅雷震奉天門十月甲戌雷電十二月己巳廣州大風雨雷電十八年二月甲午雷電雨雪二十一年五月辛丑雷震元武門獸吻六月癸卯暴風雷震洪武門獸吻宣德九年六月甲子雷震大祀壇外西門獸吻正統八年五月戊寅雷震奉天殿鴟吻七月辛未雷震南京西角門樓獸吻是日大同巡警軍

至沙溝風雷驟至裂膚斷指者二百餘人九年正月辛
亥朔雷電大雨閏七月壬寅雷震奉天殿鳩吻十一年
十二月壬寅大雨雷電翼日乃止十四年六月丙辰南
京風雨雷電謹身殿災景泰三年六月庚寅雷擊宮庭
中門傷人天順二年六月己卯雷震大祀殿鳩吻四年
六月癸丑雷毀薊州倉廩四成化三年六月戊申雷震
南京午門正樓五年二月乙卯又震山川壇具服殿之
獸吻八年四月辛未始雷十二年十一月癸亥南京大

雷雨十三年二月甲戌安慶大雪既而雷電交作十一月辛未冬至杭州大雷雨戊寅荊門州大雷電雨雪十七年七月己亥雷震郊壇承天門脊獸十一月丁酉江南大雷雨雪弘治元年五月丙子辰刻南京震雷壞洪武門獸吻己刻壞孝陵御道樹六月己酉又壞鷹揚衛倉樓聚寶門旗杆二年四月庚子又毀神樂觀祖師殿三年七月壬子又壞午門西城牆六年閏五月丁未薊州大風雷拔木偃禾牛馬有震死者十二月壬戌南京

雷雨拔孝陵樹七年六月癸酉如之七月丙辰福州雷
燬城樓八年十二月丙子長沙大雷電雨雪丁丑南昌
彭水俱大雷電雨雪電大木折十年四月雷震宣府西
橫嶺之南山傾三十餘丈七月乙卯雷擊吉王府端禮
門獸吻十二年四月丙午雷震楚府承運殿十四年閏
七月庚辰福州大風雷擊壞教場旗杆城樓大樹正德
元年五月壬辰雷震青州衣甲庫獸吻有火起庫中六
月辛酉雷擊西中門柱脊暴風折郊壇松栢大祀殿及

齋宮獸瓦多墮落者丙子南京暴風雨雷震孝陵白土
岡樹十二月己巳朔南通州雷再震四年十二月壬寅
杭州大雨雷電越二日復作五年六月丙申雷震萬全
衛紫溝堡斃墩軍四人七年五月戊辰雷震餘干萬春
寨旗杆狀如刀劈閏五月丁亥雷震成都衛門及教場
旗杆十年閏四月甲申薊州賺狗崖東墩及新開嶺關
雷火震傷三十餘人十二年八月癸亥南京祭歷代帝
王雷雨大作震死齋房吏十二月庚辰瑞州大雷電十

六年八月雷擊奉天門嘉靖二年五月丁丑雷擊觀象
臺四年七月己丑雷擊南京長安左門獸吻五年四月
戊寅雷擊阜城門城樓南角獸吻及北九鋪旗杆十年
六月丁巳雷擊德勝門破民屋柱斃者四人癸亥雷擊
午門角樓及西華門城樓柱十五年六月甲申雷擊南
京西上門獸吻震死男婦十餘人十六年五月戊戌雷
震謹身殿鳩吻二十八年六月丁酉朔雷震奉先殿左
吻及東室門槨三十三年四月乙亥始雷三十八年六

月丙寅雷擊奉先殿門外南西二墻隆慶元年八月大
暑雷震次日大寒如嚴冬是夕雷震連旦四年六月辛
酉雷擊園丘廣利門鴟吻萬曆三年六月己卯雷擊建
極殿鴟吻壬辰雷擊端門鴟尾六年七月壬子雷擊南
京承天門左簷十三年七月戊子雷震郊壇廣利門震
傷榜題利字及齋宮北門獸吻十六年八月壬午雷震
南京舊西安門鐘鼓樓獸頭十九年五月甲戌太平路
喜峰路並雷擊墩臺折傷官軍二十一年四月戊戌雷

震孝陵大水二十二年六月己酉雷雨西華門災七月
壬辰雷擊祈穀壇東天門左吻二十四年二月己酉夜
鄆縣大雷雨火光遍十餘里二十五年七月庚寅朔雷
燬黃花鎮臺垣及火器三十二年五月癸酉雷燬長陵
樓又燬薊鎮松棚路墩臺三十三年五月庚子大雷電
擊燬南郊望燈高杆三十七年八月甲寅雷劈西城上
旗杆泰昌元年十月己未雷燬淮安城樓崇禎六年十
二月丁亥大風雪雷電九年正月甲戌雷燬孝陵樹十

年四月乙亥薊州雷火焚東山二十餘里十二年七月
雷擊破密雲城鋪樓所貯砲木皆碎十月乙未立冬雷
電大作十四年四月癸丑雷火起薊州西北焚及趙家
谷延二十餘里六月丙午雷震宣府西門城樓十五年
四月癸卯雷震南京孝陵樹火從樹出十六年五月癸
巳朔雷震通夕不止次日見太廟神主橫倒諸銅器為
火所鑠鎔而成灰六月丙戌雷震奉先殿鳩吻楹扇皆
裂銅鑲盡燬

魚孽嘉靖四十一年二月乙亥德州九龍廟雨魚大者數尺崇禎三年三月錢塘江木柿化為魚有首尾未變者

蝗蝻洪武五年六月濟南屬縣及青菜二府蝗七月徐州大同蝗六年七月北平河南山西山東蝗七年二月平陽太原汾州歷城汲縣蝗六月懷慶真定保定河間順德山東山西蝗八年夏北平真定大名彰德諸府屬縣蝗建文四年夏京師飛蝗蔽天旬餘不息永樂元年

夏山東山西河南蝗三年五月延安濟南蝗十四年七月畿內河南山東蝗宣德四年六月順天州縣蝗九年七月兩畿山西山東河南蝗蝻覆地尺許傷稼十四年兩京及山東河南蝗蝻傷稼正統二年四月北畿山東河南蝗五年夏順天河間真定順德廣平應天鳳陽淮安開封彰德兗州蝗六年夏四月保定真定河間順德廣平大名淮安鳳陽蝗秋彰德衛輝開封南陽懷慶太原濟南東昌青萊兗登諸府及遼東廣寧前中屯二衛

蝗七年五月順天廣平大名河間鳳陽開封懷慶河南
蝗八年夏兩畿蝗十二年夏保定淮安濟南開封河南
彰德蝗秋永平鳳陽蝗十三年七月飛蝗蔽天十四年
夏順天永平濟南青州蝗景泰五年六月寧國安慶池
州蝗七年五月畿內生蝗蝻延蔓六月淮安揚州鳳陽
大旱蝗九月應天及太平七府蝗天順元年七月濟南
杭州嘉興蝗二年四月濟南兗州青州蝗成化三年七
月開封彰德衛輝蝗九年六月河間蝗七月真定蝗八

月山東旱蝗十九年五月河南蝗二十二年三月平陽
蝗四月河南蝗七月順天蝗弘治三年北畿蝗四年淮
安揚州蝗六年六月飛蝗自東南向西北日為掩者三
日七年三月兩畿蝗嘉靖三年六月順天保定河間徐
州蝗隆慶三年閏六月山東旱蝗萬曆十五年七月江
北蝗十九年夏順德廣平大名蝗三十七年九月北畿
徐州山東蝗四十三年七月山東旱蝗四十四年四月
復蝗七月常州鎮江淮安揚州河南蝗九月江寧廣德

吐蝻大起禾黍竹樹俱盡四十五年北畿旱蝗四十六
年畿南四府又蝗四十七年八月濟南東昌登州蝗天
谷元年七月順天蝗五年六月濟南飛蝗蔽天田禾俱
盡六年十月開封旱蝗崇禎八年七月河南蝗十年六
月山東河南蝗十一年六月兩京山東河南大旱蝗十
二年五月兩京山東河南山西陝西大旱蝗十四年六
月兩京山東河南浙江大旱蝗

豕禍嘉靖七年杭州民家有豕肉膜間生字萬厯二十

二年春三河民家生八豕一類人形手足俱備額上一
目三十八年四月燕河路營生豕一身二頭六蹄二尾
六月大同後衛生豕兩頭四眼四耳四十七年六月黃
縣生豕雙頭四耳一身八足七月寧遠生豕身白無毛
長鼻象嘴天啟三年七月長州翫平溪生豕猪身人足
一目四年三月神木生豕額多一鼻逆生目深藏皮肉
合則不見四月榆林生豕一身二首二尾八足六月霍
州生豕二身二眼象鼻四耳四乳崇禎元年三月石泉

生豕類象鼻下一目甚大身無毛皮肉皆白六年二月
建昌生豕二身一首八蹄二尾十五年七月聊城生豕
一首二尾七蹄

龍蛇之孽成化五年六月河決杏花營有卵浮於河大
如人首下銳上圓質青白蓋龍卵也弘治九年六月庚
辰宣府鎮南口驟驟雨火發龍起刀鞘內十八年五月
辛卯日午旋風大起雲翳三殿若有人騎龍入雲者正
德七年六月丁卯夜招遠有赤龍懸空光如火盤旋而

上天鼓隨鳴十二年六月癸亥山陽見黑龍一龍吸水
聲聞數里攝舟及舟女至空而墜十三年五月癸丑常
熟俞野村迅雷震電有白龍一黑龍二乘雲並下口中
吐火目睛若炬撒去民居三百餘家吸二十餘舟於空
中舟人墜地多怖死者是夜紅雨如注五日乃息十四
年四月鄱陽湖蛟龍鬪嘉靖四十年五月癸酉青浦余
山九蛟並起湧水成池萬厯十四年七月戊申舒城大
雷雨起蛟百五十八跡如斧劈山崩田陷民溺死無算

是歲建昌民樵於山逢巨蛇一角六足如鷄距不噬不
驚或言此肥蠶也十八年七月猗氏大水二龍鬪於村
得遺卵尋失十九年六月己未公安大水有巨蛇如牛
首赤身黑修二丈餘所至隄潰三十一年五月戊戌歷
城大雨二龍鬪水中山石皆飛平地水高十丈四十五
年八月安邱清河村青白二龍鬪

馬異永樂十八年九月諸城進龍馬民有牝馬牧於海
濱一日雲霧晦冥有物蜿蜒與馬接產駒具龍文其色

青蒼謂之龍馬云宣德七年五月忻州民武煥家馬生
一駒鹿耳牛尾玉面瓊蹄肉文被體如鱗七月滄州畜
官馬一產二駒州以為祥獻於朝宣宗曰物理之常何
足異也成化十七年六月興濟馬生二駒弘治元年二
月景寧屏風山有異物成羣大如羊狀如白馬數以萬
計首尾相啣迤邐騰空而去嘉靖四十二年四月海鹽
有海馬萬數岸行二十餘里其一最巨高如樓

人痾前史多志一產三男事然近歲多有不可勝詳也

其稍異者志之洪武二十四年八月河南龍門婦司壯
丹死三年借乘馬頭之屍復生宣德元年十一月行在
錦衣衛校尉燕榮妻皮氏一產四子天順四年四月揚
州民婦一產五男成化十三年二月南京鷹揚衛軍陳
僧兒妻朱氏一產三男一女十七年六月宿州民張珍
氏臍下右側裂生一子二十年十二月徐州婦人
肋下生瘤久之漸大兒從瘤出二十一年嘉善民鄒亮
妻初乳生三子再乳生四子三乳生六子弘治十一年

六月騰驤左衛百戶黃盛妻宜氏一產三男一女十有六年五月應山民張本華妻崔氏生鬚長三寸是時鄭陽商婦生鬚三縷約百餘莖嘉靖二年六月曲靖衛舍人胡晟妻生一男兩頭四手三足四年橫涇農孔方脇下產肉塊剖視之一宛然五年江南民婦生妖六目頭面有角手足各一節獨爪鬼聲十一年當塗民婦一產三男一女十二年貴州安衛軍李華妻生男兩頭四手四足二十七年七月大同右衛參將馬繼舍人馬錄女

年十七化為男子隆慶二年十二月靜樂男子李良雨
化為婦人五年二月唐山民婦生兒從左脇出萬曆十
年浙川人化為狼十八年南宿州民婦一產七子膚髮
紅白黑青各色三十七年六月繁峙民李宜妻牛氏一
產二女頭面相連手足各分四十六年廣寧衛民婦產
一猴二角四齒是時大同民婦一產四男崇禎八年夏
鎮江民婦產一子頂戴兩首臂贅一首與母俱斃十五
年十一月曹縣民婦產兔兩頭頂上有眼手過膝

疾疫永樂元年正月江西建昌撫州福建建寧邵武自
去年至是月疫死者七萬八千四百餘人八年登州寧
海諸州縣自正月至六月疫死者六千餘人邵武北歲
大疫至是年冬死絕者萬二千戶九年七月河南陝西
疫十一年六月湖州三縣疫七月寧波五縣疫正統九
年冬紹興寧波台州瘟疫大作及明年死者三萬餘人
景泰四年冬建昌武昌漢陽疫六年四月西安平涼疫
七年五月桂林疫死者二萬餘人天順五年四月陝西

疫成化十一年八月福建大疫延及江西死者無算正
德元年六月湖廣平溪清涼鎮遠偏橋四衛大疫死者
甚衆靖州諸處自七月至十二月大疫建寧邵武自八
月始亦大疫十二年十月泉州大疫嘉靖元年二月陝
西大疫二年七月南京大疫軍民死者甚衆四年九月
山東疫死者四千一百二十八人三十三年四月都成
內外大疫十四年正月京師饑且疫萬厯十年四月
京師疫十五年五月又疫十六年五月山東陝西山西

浙江俱大旱疫崇禎十六年京師大疫自二月至九月
止明年春北畿山東疫

鼓妖洪武五年八月己酉徐溝西北空中有聲如雷十
一年瑞昌有大聲如鐘自天而下無形天順六年九月
乙巳夜天無雲西北方有聲如雷七年二月晦夜空中
有聲大學士李賢奏無形有聲謂之鼓妖上不恤民則
有此異成化十三年正月甲子代州無雲而雷十四年
八月戊戌早朝東班官聞若有甲兵聲者辟易不成列

久之始定弘治六年四月丁卯石州吳城驛無雲而震者再十七年六月甲申江西廬山鳴如雷嘉靖二十九年二月甲子隆慶州張山營堡山鳴萬厯十二年十二月乙未蕭縣山鳴如驚濤澎湃竟夜不止二十八年八月戊戌西北方有聲如雷天啟七年八月丁巳莊烈即位朝時空中有聲如天鼓發於殿西崇禎十二年十二月乙未蕭縣山鳴是月西山大鳴如雷如風濤十三年二月壬子浙江省城門夜鳴十六年冬建極殿鳩吻中

有聲似鶉鳩曰苦苦其聲漸大復作犬吠聲三日夜不止明年三月辛丑孝陵夜有哭聲亦鼓妖也

隕石成化六年六月壬申陽信雷聲如嘯隕石一碎為三外黑內青十四年六月辛亥臨晉天鳴隕石縣東南三十里入地三尺大如升色黑二十三年五月壬寅東鹿空中響如雷青氣墜地掘之得黑石二一如椀一如鷄卵弘治三年三月慶陽雨石無數大小不一大者如鵝卵小者如芡實四年十月丁巳光山有紅光如電自

西南往東北聲如鼓久之入地化為石火如斗十年二月丙申修武黑氣入地化為石壯如羊首十二年五月戊寅朔州有聲如迅雷白氣上騰隕大石三正德元年八月壬戌夜有火光落即墨化為綠石圓高尺餘九年五月己卯濱州有聲隕石十三年正月己未鄰水隕石一嘉靖十二年五月丁未祁縣有聲如鼓火流墜地為石四十二年三月癸卯懷慶隕石隆慶二年三月己未保定新城隕黑石二萬曆三年五月癸亥有二流星晝

隕景州城北化為黑石十七年九月戊午萬載黑烟騰
起隕石演武廳畔十九年四月辛酉遵化隕石二十四
四年正月丁丑易州及紫荆關有光化石崩裂崇禎九
年九月丁未太康隕石

水潦洪武元年六月戊辰江西永新州大風雨蛟出江
水入城高八尺人多溺死事關使賑之三年六月溧水
縣江溢漂民居四年七月南寧府江溢壞城垣衢州府
龍游縣大雨水漂民廬男女溺死五年八月嵯縣義烏

餘杭山谷水湧人民溺死者衆六年二月崇明縣為潮
所沒七月嘉定府龍游縣洋雅二江漲翼日南溪縣江
漲俱漂公廨民居七年八月高密縣膠河溢傷禾八年
七月淮安北平河南山東大水十二月直隸蘇州湖州
嘉興松江常州太平寧國浙江杭州俱水九年江南湖
北大水七月湖廣山東大水十年六月永平灤漆二水
沒民廬舍七月北平八府大水壞城垣十一年七月蘇
松揚台四府海溢人多溺死十月丙辰河決蘭陽十二

年五月青田山水沒縣治十三年十一月崇明朝決沙岸人畜多溺死十四年八月庚辰河決原武十五年二月壬子河南河決三月庚午河決朝邑七月河溢滎澤陽武是歲北平大水七年八月丙寅河決開封府橫流數十里是歲河南北平俱水十八年八月河南又水是年江浦大名水二十三年正月庚寅河決歸德七月癸巳河決開封漂沒民居又海門縣風潮壞官民廬舍漂溺者衆是歲襄陽沔陽安陽水二十四年十月北平河

閏二府水二十五年正月河決陽武開封州縣十一俱
水二十六年十一月青兗濟寧三府水二十七年三月
寧陽汶河決二十八年八月德州大水壞城垣三十年
八月丁亥河決開封三面皆水犯倉庫永樂元年五月
章邱漯河決岸傷稼南海番禺潮溢八月安邱縣紅河
決二年六月蘇松嘉湖四府俱水七月湖廣江西水九
月河決開封壞城三年三月溫縣水決隄四十餘丈濟
澇二水溢八月杭州屬縣多水濟男婦四百餘人七年

五月安陸州江溢決渲馬灘圩岸千六百餘丈六月壽
州水決城是歲泰興江岸淪於江者三千九百餘丈渾
河決固安八年五月平度州澱水及浮糠河決浸百十
三所七月平陽縣潮溢漂廬舍八月庚申河溢開封十
二月戊戌河決汴梁壞城九年正月高郵覺社等九湖
及天長諸水暴漲六月揚州屬州縣五江潮漲四日漂
人畜甚衆七月海寧潮溢漂溺者甚衆八月漳衛二水
決堤滄田九月雷州颶風暴雨滄遂溪海康壞田八百

餘頃溺死者千六百餘人是歲湖廣河南水十年七月
廬溝水漲壞橋及隄岸溺死人畜保定縣決河五十四
處十一月吳橋東光興濟交河天津決隄傷稼十二月
安州水決直亭等河口八十九處十二年十月臨晉涑
河逆流決姚暹渠堰流入硝池滄沒民田將及鹽池崇
明朝暴至漂廬舍五千八百餘家十三年六月北畿河
南山東水溢壞廬舍沒田禾臨清尤甚滄漳二水漂磁
州民舍十四年夏南昌諸府江漲壞民廬舍七月開封

州縣十四河決隄岸永平灤漆二河溢壞民田禾福寧
延平邵武廣信饒州衢州金華七府俱溪水暴漲壞城
垣房舍溺死人畜甚衆遼東遼河代子河水溢浸沒城
垣屯堡十八年夏秋仁和海寧潮湧堤淪入海者千五
百餘丈二十年五月廣東諸府潮溢漂廬舍壞倉糧溺
死三百六十餘人夏秋湖廣沔陽江漲河南北及鳳陽
河溢二十一年五月峩眉溪漲溺死百三十餘人八月
瓊州府潮溢漂溺甚衆二十二年七月黃巖潮溢溺死

八百人九月庚辰河溢開封洪熙元年六月驟雨白河
溢衝決河西務白浮宋家等口隄岸臨漳漳滏二河決
隄岸二十四真定滹沱河大溢沒三州五縣田七月容
城白溝河漲傷禾稼渾河決盧溝橋白狼窩口順天河
間保定灤州俱水宣德元年六七月江水大漲襄陽穀
城均州鄖縣綠江居民漂沒者半黃汝二水溢滄開封
十州縣及南陽汝州河南嵩縣三年五月邵陽武岡湘
鄉暴雨七晝夜山水驟長平地高六尺永寧衛大水

壞城四百丈六月渾河水溢決盧溝河隄百餘丈七月
北畿七府俱水五年七月南陽山水泛漲衝決堤岸漂
流人畜廬舍六年六月渾河溢決徐家等口順天保定
真定河間州縣二十九俱水河決開封沒八縣七年六
月大原河汾並溢傷稼八年六月江西瀕江八府江漲
漂沒民田溺死男婦無算九年正月沁鄉沁水漲決馬
曲灣經獲嘉新鄉平地成河五月寧海縣潮決徙地百
七十餘頃六月渾河決東岸自狼河口至小屯廠順天

順德河間俱水七月遼東大水正統元年閏六月順天
真定保定濟南開封彰德六府俱大水二年鳳陽淮安
揚州諸府徐和滁諸州河南開封四五月河淮泛漲漂
居民禾稼九月河決陽武原武滎澤湖廣沿江六縣大
水決江隄三年陽武河決武陟沁決廣平順德漳決通
州白河溢四年五月京師大水壞官舍民居三千三百
九十區順天真定保定三府州縣及開封衛輝彰德三
府俱大水七月潯沁漳三水俱決壞饒陽獻縣衛輝

彰德隄岸八月白溝渾河二水溢決保定安州堤蘇常鎮三府及江寧五縣俱水溺死男婦甚衆九月濬沱復決深州滄百餘里五年五月至七月江西江溢河南河溢八月潮決蕭山海塘六年五月泗州水溢丈餘漂廬舍七月白河決武清滌縣堤二十二處八月寧夏久雨水泛壞屯堡墩臺甚衆八年六月渾河決固安八月台州松門海門海潮泛溢壞城郭官亭民舍軍器九年七月揚子江沙洲潮水溢漲高丈五六尺溺男女千餘人

閏七月北畿七府及應天濟南岳州嘉興湖州台州俱
大水河南山水灌衛河沒衛輝開封懷慶彰德民舍壞
衛所城十年三月洪洞汾水堤決移置普潤驛以遠其
害夏福建大水壞延平府衛城沒三縣田禾民舍人畜
漂流無算河南州縣多大水七月延安衛大水壞護城
河隄九月廣東衛所多大水十月河決山東金龍口陽
穀隄十一年六月渾河溢固安兩畿浙江河南俱連月
大雨水是歲太原克州武昌亦俱大水十二年春贛州

臨江大水五月吉安江漲滄田十三年六月大名河決
滄三百餘里壞廬舍二萬區死者千餘人河南濟南青
兗東昌亦俱河決七月寧夏大水河決漢唐二壩河南
八樹口決漫曹濮二州抵東昌壞沙灣等堤十四年四
月吉安南昌臨江俱水壞壇廟廡舍景泰元年七月應
天大水沒民廬三年六月河決沙灣白馬頭七十餘丈
八月徐州濟寧開平地水高一丈民居盡圯南畿河南
山東陝西吉安袁州俱大水四年春夏河連決沙灣五

年六月揚州潮決高郵寶應堤岸七月蘇松淮揚廬鳳
六府大水八月東兗濟三府大水河漲滄田六年六月
開封保定俱大水閏六月順天大水滌河泛溢壞城垣
民舍河間永平水患尤甚武昌諸府江溢傷稼七年六
月河決開封河南彰德田廬滄沒是歲畿內山東俱水
天順元年夏淮安徐州懷慶衛輝俱大水河決三年六
月穀城景陵襄水湧泛傷稼四年夏湖北江漲滄沒麥
禾北畿及開封汝寧大水七月淮水決沒軍民田廬五

年七月河決開封土城築磚城禦之越三日磚城亦潰
水深丈餘周王後宮及官民乘筏以避城中死者無算
襄城水決城門溺死甚衆崇明嘉定崑山上海海潮衝
決溺死萬二千五百餘人浙江亦大水六年七月淮安
大水潮溢溺死鹽丁千三百餘人七年七月密雲山水
驟漲軍器爨卷房屋俱沒成化三年六月江夏水決江
口堤岸迄漢陽長八百五十丈有奇五年湖廣大水山
西汾水傷稼六年六月北畿大水七年閏九月山東及

浙江杭嘉湖紹四府俱海溢濟田宅人畜無算九年六月畿南五府及懷慶俱大水八月山東大水十一年五月湖廣水十二年八月浙江風潮大水淮鳳揚徐亦俱大水十三年二月甲戌安慶大雪次日大雨江水暴漲閏二月河南大水九月淮水溢壞淮安州縣官舍民屋滄沒人畜甚衆十四年四月襄陽江溢壞城郭五月陝州大水人多滄死七月北畿山東水九月河決開封護城堤五十丈十八年七月昌平大水決居庸關水門四

十九城垣鋪樓墩臺一百二八月衛漳漳沱並溢自清
平抵天津弘治二年五月河決開封黃沙岡抵紅船灣
凡六處入沁河所經州縣多災省城尤甚七月順永河
保四府州縣大水八月盧溝河堤壞四年八月蘇松浙
江水五年夏秋南畿浙江山東水七年七月蘇常鎮三
府潮溢平地水五尺沿江者一丈民多溺死九年六月
山陰蕭山崩水湧溺死三百餘人十四年五月貴池
水漲蛟出滄死二百六十餘人旁邑十二皆大水七月

廉州及靈山海漲滄死百五十餘人閏七月瓊山颶風
潮溢平地水高七尺八月安寧池太四府大水蛟出漂
流房屋十五年七月南京江水泛溢湖水入城五尺餘
十七年六月廬山平地水丈餘溺死星子德安民及漂
沒廬舍甚衆正德元年六月陝西徽州河溢漂沒居民
孳畜二年六月固原河漲平地水高四尺人畜溺死三
年九月延綏慶陽大水五年九月安寧太三府大水溺
死二萬三千餘人十一月蘇松常三府水六年六月汜

水暴漲溺死百七十六人毀城垣百七十餘垣十二年
順天河間保定真定大水鳳陽淮安蘇松常鎮嘉湖諸
府皆大水荆襄江水大漲十五年五月江西大水十六
年七月遼陽湯站堡大水決城嘉靖元年七月南京暴
風雨江水湧溢郊社陵寢宮闕城垣吻脊欄楯皆壞拔
樹萬餘株江船漂沒甚衆廬鳳淮揚四府同日大風雨
電河水泛漲溺死人畜無算二年七月揚徐復大水夏
秋間山東州縣俱大水八月蘇松常鎮四府大水開封

亦如之五年六月陝西五卽壩大水三丈餘衝決官舍
徐河溢壞豐縣城至六年秋湖廣水十六年秋兩畿山
東河南陝西浙江各被水災湖廣尤甚二十六年七月
丙辰曹縣河決城池漂沒溺死者甚衆二十七年正月
汧陽大水沒城隆慶元年夏京師大水六月新河鮎魚
口沉運船數百艘是歲襄陽鄖陽水二年七月台州颶
風海潮大漲挾天台山諸水入城三日溺死三萬餘人
沒田十五萬畝壞廬舍五萬區三年閏六月真定保定

淮安濟南浙江江南俱大水七月壬午河決沛縣自考
城虞城曹單豐沛至徐州壞田廬無算九月淮水溢自
清河至通濟閘及淮安城西淤三十里決二壩入海莒
沂邳城之水又溢出邳州溺人民甚衆四年七月沙薛
汶泗諸水驟溢決仲家淺等漕堤八月陝西大水河決
州五年四月又決邳州自曲頭集至王家口新堤
壞是歲山東河南大水萬厯元年七月荊州承天大水
二年六月福建永定大水溺七百餘人是歲海鹽海大

溢死者三千人八月庚午淮安揚州徐州河溢傷稼三年四月淮徐大水五月淮水大決六月杭嘉寧紹四府海湧數丈沒戰船廬舍人畜不計其數八月淮揚鳳徐四府州大水河決高郵碭山及邵家口曹家莊九月蘇松常鎮四府俱水四年正月高郵清水堤決九月河決豐沛曹單十一月淮黃交溢五年閏八月徐州河淤淮河南徙決高郵寶應諸湖堤六年六月清河水溢七年五月蘇松鳳陽徐州大水八月又水是歲浙江大水九月

年五月從化增城龍門溪壑泛漲田禾盡沒滄死男婦
無算七月福安洪水踰城漂沒廬舍殆盡八月泰興海
門如率大水塘圩坡埂盡決溺死者甚衆十年正月淮
揚海漲浸豐利等鹽場三十滄死二千六百餘人七月
蘇松六州縣潮溢壞田禾十萬頃溺死者二萬人十一
年四月承天江水暴漲漂沒民廬人畜無算金州河溢
沒城十四年夏江南浙江江西湖廣廣東福建雲南遼
東大水十五年五月浙江大水七月開封及陝州靈寶

河決是歲抗嘉湖應天太平五府江湖泛溢平地水深丈餘七月終颶風大作環數百里一望成湖十六年八月河決東光魏家口十七年六月浙江海沸杭嘉寧紹台屬縣廨宇多圯碎官民船及戰舸壓溺者二百餘人十九年六月蘇松大水溺人數萬七月寧紹蘇松常五府濱海潮溢傷稼滄人九月泗州大水州治浸三尺淮水高於城祖陵被浸十月揚州湖淮漲溢決邵伯堤五十餘丈高郵南北開俱衝二十年夏秋真順廣大四府

水二十一年五月邳州高郵寶應大水決湖堤二十二
年七月鳳陽廬州大水二十三年四月泗水浸祖陵二
十四年秋杭嘉湖三府大水二十九年八月沔陽大水
入城三十年六月京師大水三十一年五月成安永年
肥鄉安州深澤漳滏沙燕河並溢決堤橫流祁州靜海
杞城垣廬舍殆盡六月泰安大水滄八百餘人八月泉
州諸府海水暴漲溺死萬餘人三十二年六月昌平大
水壞各陵橋道七月永平真保三府俱水滄男婦無算

八月河決蘇家莊泲豐沛黃水逆流灌濟寧魚臺單縣
三十五年六月黃州蛟起武昌承天鄖陽岳州常德大
水漂沒廬舍徽州寧國太平嚴州四府山水大湧漂人
口甚衆閏六月京師大水長安街水深五尺三十七年
九月福建江西大水四十一年六月通惠河決七月京
師大水南畿江西河南俱大水八月山東廣西湖廣俱
大水九月遼東大水四十二年浙江江西兩廣俱水四
十四年七月江西廣東水四十六年八月潮州六縣海

颶大作溺萬二千五百餘人壞民居三萬間天啟三年
睢寧河決六年秋河決堤頭灣倒入駱馬湖自新安鎮
抵邳宿民居盡沒是歲順天永平二府大水邊垣多圯
崇禎元年七月壬午杭嘉紹三府海嘯壞民居數萬間
溺數萬人海寧蕭山尤甚三年山東大水四年六月又
大水五年六月壬申河決孟縣口橫浸四百里七年五
月卯眉諸州縣大水壞城垣田舍人畜無算十年八月
叙州大水民登州堂及高阜者得免餘盡沒十三年五

月浙江大水十四年七月福州風潮泛溢漂溺甚衆十五年六月汴水決九月壬午河決開封朱家寨癸未城圯溺死士民數十萬

水變洪武五年河南黃河竭行人可涉天順二年十二月癸未武強苦井變為甘弘治十五年八月丙辰融縣河水紅濁如黃河十月丙辰馬湖底渴江水白可鑿翌日濁如泔漿凝兩岸沙石上者如土粉十七日乃澄丁巳叙州東南二河白如雪濃如漿者三日十五年九月

丙戌濮州井溢沙土隨水而出正德元年七月文安水
忽僵立是日大寒結為冰柱高圍俱五大中空旁穴數
日而賊至民避穴中生全者甚衆隆慶六年夏五月南
畿龍目井化為酒萬曆二十二年四月南京正陽門水
赤三日二十五年八月甲申蒲州池塘無風湧波溢三
四尺臨淄濠水忽漲南北相向而闕又夏莊大灣潮忽
起聚散不恒聚則丈餘開則見底樂安小清河逆流臨
清磚板二開無風大浪三十年閏二月戊午河州蓮寨

黃河涸四十六年四月宣武正陽門外水赤三里如血
一月乃止四十七年四月宣武門響閘至東御河水復
赤崇禎十年寧遠衛井鳴沸三日乃止河南汝水變色
深黑而味惡飲者多病十三年華陰渭水赤十四年山
西潞水北流七晝夜勢如潮湧十五年達州井鳴濠水
變血十六年松江自五月至七月不雨河水盡涸而泖
水忽增數尺

黑晉黑祥洪武十年正月丁酉金華處州雨水如墨汁

十四年正月黑氣亘天十一月壬午黑氣亘天者再二
十一年二月乙卯黑氣亘天宣德元年二月戊子北方
黑氣東西亘天八月辛巳樂安城中有黑氣如死灰正
統元年九月辛亥未刻黑氣亘天自西南屬東北二年
八月甲申北方黑氣東西亘天十四年十一月己丑晡
時西方有黑氣從地而生景泰元年二月壬寅黑氣南
北亘天十月辛未西南黑氣如烟火南北亘天二年四
月庚辰有黑氣如烟摩地而上天順五年七月己亥朔

東方有黑氣須臾蔽天成化七年四月丙辰雨黑沙如
漆八年三月庚子黑氣起西北臨清德州晝晦十二年
七月庚戌京師黑音見民間男女露宿有物金睛修尾
狀如犬狸負黑氣入牖直抵密室至則人昏迷徧城驚
擾操双張燈鳴金鼓逐之不可得帝常朝奉天門侍衛
見之而譁帝欲起懷恩持帝衣頃乃定弘治五年二月
己巳北方黑氣東西亘天六年八月壬申南京有黑氣
東西百餘丈十四年四月辛未應州黑氣大作十六年

二月庚子宜良黑氣迷空咫尺莫辨人形正德七年六月壬戌黑晝見順德河間及涿大者如犬小者如猫夜出傷人有至死者尋見於京師形赤黑風行有聲居民夜持刁斗相警達旦逾月乃息後又見於封邱十二年閏二月丁丑夜瑞州有紅氣變白形如曲尺中外二黑氣相鬪者久之八年十月癸巳杭州雨黑水三十七年三月衡州黑晝見隆慶二年四月天雨黑豆六年四月杭州黑霧有物蜿蜒如車輪目光如電冰雹隨之萬厯

二十四年十二月辛卯同安生黑毛二十五年二月癸亥湖州黑雨雜以黃沙崇禎十年山東雨黑水新鄉亦如之十一年京師有黑苔狀如狸入民家為祟半歲乃止十三年正月丁卯黑氣彌空者三日

明史卷二十八

欽定四庫全書

明史卷二十九

大學士張廷玉等奉 敕修

志第五

五行二

火

木

洪範曰火曰炎上火不炎上則失其性矣前史多以恒燠草
異羽蟲之孽羊禍火災火異赤青赤祥皆屬之火今從之

恒燠洪熙元年正月癸未以京師一冬不雪詔諭修省

正統九年冬畿內外無雪十二年冬陝西無雪景泰六年冬無雪天順元年冬宮中祈雪是年直隸山西河南山東皆無雪二年冬命百官祈雪六年冬直隸山東河南皆無雪成化元年冬無雪五年冬燠如夏六年二月壬申以自冬徂春雨雪不降敕諭羣臣親詣山川壇請禱十年二月南京山東奏冬春恒燠無雪冰十一年冬以無雪祈禱十五年冬直隸山東河南山西無雪十九年冬京師直隸無雪弘治九年冬無雪十五年冬無雪

十八年冬溫如春無雪正德元年冬無雪永嘉自冬至
春麥穗桃李實三年冬無雪六年至九年連歲無雪十
一年冬無雪嘉靖十四年冬深無雪遣官徧祭諸神十
九年冬無雪二十年十二月癸卯禱雪於神祇壇二十
四年十二月甲午命諸臣分告宮廟祈雪三十二年冬
無雪三十三年十二月壬申以災異屢見即禱雪日為
始百官青衣辦事三十六年冬無雪三十九年冬無雪
明年又無雪帝將躬禱會大風命巫禱雪兼禳風變四

三十一
卷二十九
十一年至四十五年冬祈雪無虛歲隆慶元年冬無雪
四年冬無雪萬曆四年十二月己丑命禮部祈雪十六
年十七年二十九年三十七年四十七年亦如之崇禎
五年十二月癸酉命順天府祈雪六年冬無雪

草異永樂十六年正月乙丑同州澄城郃陽朝邑雨穀
及蕎麥正統八年十一月殿上生荆棘高二尺十四年
廣州嶽竹牀踰年忽青生葉成化六年二月戊寅湖廣
應山雨粟弘治八年二月枯竹開花實如麥米苦蕒開

蓮花六月甲子黟縣雨豆味不可食九年黃州民家瓜
大如斗瓢皆赤血萬厯四十三年四月戊寅石首雨豆
大小不一色雜紅黑崇禎四年五年河南草生人馬形
如被甲持矛馳驅戰鬥者然十三年徐州田中白豆多
作人面眉目宛然

羽蟲之孽萬厯二十五年二月壬午岳州民家有鴨舍
絮裹火飛上屋入竹椽茅茨中火四起延燒數百家四
十三年四月壬午雙鶴啣火飛集掖縣海神廟殿明日

廟火崇禎六年汝寧有烏鳩身猴足鳳陽惡鳥數萬兔
頭雞身鼠足供饌甚肥犯其骨立死

羊禍萬曆三十八年四月崞縣民家羊產羔一首二眼
四耳二尾八足三十九年四月降夷部產羔人面而羊
身

火災洪武元年閏七月丁酉京師火延燒永濟倉三年
二月己巳大河衛火燔及廣積庫七月乙未寶源局火
甲子鳳臺門軍營火延燒武德衛軍器局四年十一月

癸亥京師大軍倉災五年二月癸未臨濠府火壬辰至
甲午京師火燬龍驤等六衛軍民廬舍七月丁卯永清
衛軍器庫火十二月丙戌京師定遠等衛火焚及軍器
局兵仗十七年十二月己未潮州火官廨民舍及倉廩
兵仗圖籍焚蕩無遺二十一年二月戊辰歷代帝王廟
火上元縣治亦災甲戌天界能仁二寺災二十九年二
月辛丑通州火燔屋千九百餘三十年四月甲午廣南
衛火延燒城樓及衛治倉庫建文二年八月癸巳承天

門災永樂四年十二月辛亥甌寧王邸第火王薨十三年正月壬子北京午門災十九年四月庚子奉天謹身華蓋三殿災二十年閏十二月戊寅乾清宮災宣德三年三月己亥東嶽泰山廟火六年八月武昌火延燒楚王宮譜系敕符俱燼甲辰天津右衛北城外火飛燄入城燒倉穀九年二月庚午京城東南樓火正統二年二月西鎮吳山廟火三年八月辛酉順天貢院火席舍多焚改期再試十二月乙亥韓府承運殿災四年三月戊

午代府寢殿火七年正月廣昌木廠火焚松木八千八百餘株戊午南京內府火燔廊房六十餘間圖書器用守衛衣甲皆空三月辛未趙城禍皇寢廟火十年正月庚寅忠義前後二衛災是時太倉屢火遣官禱祭火龍及太歲以禳之五月甲申忠義後衛倉復火癸巳通州右衛倉火十一月丁酉御花房火十一年秋武昌火死者數百人十二月乙未周府災十二年六月南京山川壇災十三年二月癸酉忠義前衛倉火十四年六月丙

辰夜南京謹身奉天華蓋三殿災景泰二年六月丙子
青州廢齊府火三年八月戊寅秦府火五年春南京火
延燒數千家七年九月壬申寧府火延燒八百餘家天
順元年七月丙寅夜承天門災二年五月戊子器四殿
火三年九月庚寅肅州城中火延燒五千四百餘家死
者六十餘人四年八月己巳光祿寺大烹內門火是歲
楚府頻火宮殿家廟悉燬五年三月丁卯南京朝天宮
災六年六月癸未楚府火七年正月丁酉南京西安門

木廠火延燒皇牆二月戊辰會試天下舉人火作於貢院御史焦顯扃其門燒殺舉子九十餘人成化二年九月癸未南京御用監火六年十一月己亥江浦火延燒二百六十餘家九年七月庚戌東直門災十一年四月壬辰夜乾清宮門災十三年十一月壬辰太倉米麥歲久蒸浥自焚百餘石十八年八月丙午合州火延燒千五百餘家乙卯楚府火凡三發十一月戊午南京國子監火十二月乙卯器皿廠火壬辰寧河王府火先有妖

夜見或為神或為王侯時舉火作欲焚狀是夜燔府第
無遺冠服用皆盡二十年正月戊戌欽天監火二十
二年六月臨海縣災延燒千七百餘家弘治元年三月
庚寅南京內花園火十一月丁丑夜南京甲字庫災二
年四月乙未南京神樂觀火四年二月戊午禮部官舍
火六年四月甲寅刑部官舍火辛酉夜南京舊內災八
年三月戊子鎮東等堡躍火星如斗燬官民倉廩人馬
多斃十一年自春徂夏貴州大火燬官民房舍千八百

餘所死傷者六千餘人十月甲戌夜清寧宮災十二年
六月甲辰夜闕里聖廟災十二月建陽縣書坊火古今
書板皆燼十三年二月乙酉禮部官舍火七月甲寅南
城縣空中有火乍分乍合流光下墜十餘丈隱隱有聲
燬軍民廬舍庚申永寧衛雁尾山至居庸關之石縱山
東西四十餘里南北七十餘里延燒七晝夜閏七月辛
巳福州城樓燬八月己未藩府火十一月庚辰寧河府
火十六年三月庚午遼東鐵嶺衛墜火如斗丙子火起

燒房屋二千五百餘間死者百餘人四月戊午寬河衛倉災燬米豆四萬餘石九月戊寅廣寧衛城火燔三百餘家十七年四月丁巳淮安火焚五百餘家五月癸巳正陽門內西廊火燔武功坊正德元年二月庚寅鄖陽火燬譙樓官舍延百餘家是歲寧夏左屯衛紅氣亘天既而火作城樓臺堡俱盡六月庚寅大同平虜城災燔藁百萬餘十一月己亥臨海縣治火延燒數千家七年三月己未嶧縣有火如斗自空而墮大風隨之燬官民

房千餘間火逸城外延及邱木庚申成山衛奏皇廟火
屋宇悉燬像設如故是月文登大桑樹火樹燔而枝葉
無損五月癸酉至閏五月丙子遼東懿路城火三作焚
官民廬舍之半九月壬午玉山火燔學舍及民居三百
餘家八年六月辛酉豐城縣西南連隕火星如盃如斗
既而火作至七月初始熄燔二萬餘家七月戊子火隕
龍泉縣治四千餘家十月壬寅饒州及永豐浮梁火各
燔五百餘家梁橋學舍災庚申臨江火燔官舍延八百

餘家九年正月庚辰乾清宮火十一年八月丁丑黜陽
火燬城樓官廨延七百餘家十二年正月甲辰清寧宮
小房火四月裕陵神宮監火八月丁卯南昌火燔三百
家九月壬午建安火燔二百五十餘家十三年二月己
卯夷陵火燔七百餘家八月庚辰獻陵明樓災丁酉延
平火燔五百餘家十四年四月乙巳淮安新城火七月
丙辰奉寧火燔五千餘家十五年五月辛卯靜樂火燔
八百餘家嘉靖元年正月己未清寧宮後三小宮災楊

廷和言廢禮之應不報二月己丑南京針線殿火己亥
通州城樓火二年五月丙子榮府火九月戊辰秦府宮
殿火四年三月壬午夜仁壽宮災王德安喜景福諸殿
俱燼五年三月乙酉趙府家廟火六年三月丁亥西庫
火八年十月癸未大內所房災十年正月辛亥大內東
偏火四月庚辰兵工二部公廨災燬文籍十三年六月
甲子南京太廟火燬前後殿東西廡神厨庫十五年四
月癸卯山西平虜衛火盡燬神機官庫軍器十八年二

月乙丑趙州及臨洺鎮行宮俱火丁卯駕幸磁州行宮
四更火陸炳負帝出後宮及內侍有殞於火者六月丁
酉皇城北鼓樓災二十年四月辛酉夜宗廟災燬成仁
二廟主二十五年五月壬申盛甲殿火二十六年十一
月壬午宮中火釋楊爵於獄三十一年八月乙丑南京
試院火三十五年九月戊辰杭州大火延燒數千家三
十六年四月丙申奉天華蓋謹身三殿文武二樓午門
奉天門俱災三十七年正月光祿寺災三十八年正月

癸未前軍都督府災四十年十一月辛亥夜萬壽宮災
四十四年己亥夜大明門內西千步廊火隆慶二年正
月浙江省城外災燬室廬舟艦以千計三月乙亥乾清
坤寧兩宮一時俱燼五年二月壬子南京廣惠二倉火
萬曆元年十一月己亥慈寧宮後舍火三年四月甲戌
工部後廠火五年十月丙申禁中火十一月癸未宗人
府災十一年十二月庚午夜慈寧宮災十二年二月己
酉無逸殿災十二月癸卯朔又災十五年五月甲子司

設監火十八年三月辛酉遼東寨山兒堡火燬城堡器
械傷九十餘人十九年十二月甲辰萬法寶殿災二十
一年六月望太倉公署後樓有礮聲火藥器械俱燼二
十二年五月壬寅天火燔鐵嶺衛千餘家二十四年二
月甲寅潞府門火三月乙亥火發坤寧宮延及乾清宮
俱燼二十五年二月壬午杭州火燒官民房千三百餘
間丙戌馬湖平山災延燔八百餘家斃二十四人三月
癸卯泗州大火燒民房四千餘盱眙火燔民房百六十

餘間撥漕糧二萬石以振六月戊寅三殿災火起歸極
門延皇極等殿文昭武成二閣周遭廊房一時俱燼十
二月甲寅吏部文選司署火二十七年十一月壬申內
府火延燒尚寶司印綬監工部廊至銀作局山牆而止
二十八年三月南陽火延燒唐府二十九年正月己巳
鐵嶺衛火車輻火藥俱燼八月己卯大光明東配殿災
三十年二月乙酉魏國公賜第火十月丙申孝陵災十
二月庚子南海普陀山寺災三十一年九月戊寅通州

漕艘火三十三年二月乙丑御馬監火五月辛巳洗白
廠火九月甲午昭和殿火丙申官軍於盛甲廠支火藥
藥年久凝如石用斧劈之火突發聲若震霆刀鎗火箭
迸射百步外軍民死者無數十一月丁卯刑部提牢廳
火三十五年二月乙卯易州神器庫火四月丁酉通州
西倉火十月己卯南京行人司署燬三十七年正月庚
子慶府火燔寢宮及帑藏三月丙戌武昌火越二日又
火共燔二百六十餘家六月慶府災十月戊午朝日壇

火三十八年四月丁丑夜正陽門箭樓火三十九年四月戊子怡神殿災四十一年五月壬午蜀府災門殿為燼四十三年四月壬午黃花鎮柳溝火延燒數十里甲午蜀府殿庭災遼東長寧堡自二月至五月火凡五發燬房屋人畜無算閏八月辛亥通州糧艘火九月丁丑湖口稅廨燬十四年十一月己巳隆德殿災丁亥南城延喜宮災四十五年正月壬午東朝房火延燬公生門十一月丙戌宣禧宮災四十六年閏四月丁丑夜開

原殷家莊堡臺杆八同時燼甲申煖閣殿膳房火九月
壬子茂陵火四十七年四月癸酉盛甲殿火泰昌元年
十月丁卯臧鸞宮災天啟元年閏二月丙戌昭和殿災
三月甲辰杭州火延燒六千餘家七月戊子復災城內
外延燒燬萬餘家二年五月丙申旗纛廟正殿災火藥
焚匠役多死者三年七月辛卯南京大內左傍宮災六
年五月戊申王恭廠災地中霹靂聲不絕火藥自焚煙
塵障空白晝晦冥凡四五里五月癸亥朝天宮災七月

庚寅登州城樓火七年十月庚子寧遠前屯火傷男婦
二百餘人崇禎元年四月乙卯左軍都督府災五月乙
亥鷹坊司火丁亥丁字庫火七月己卯公安縣火燬文
廟延五千餘家二年十一月庚子火藥局災三年三月
戊戌又災八月癸酉頭道關災火器轟擊無餘六年正
月癸丑濟南舜廟災七年九月庚申盛甲廠災十一年
四月戊戌新火藥局災傷人甚衆六月癸巳安民廠災
震毀城垣廨舍居民死傷無算八月丁酉火藥局又災

火異成化二十一年正月甲申朔有火光自中天而火
西墜於下化為白氣復曲折上騰聲如雷弘治三年三
月庚午儀隴空中有紅白火燄長三丈餘自縣治東北
流至正東六十餘里而墜聲震如雷八年三月辛卯廣
寧右衛臺杆火高五寸杆如故十年四月辛丑阜平有
火光長八九尺大如轆軸有聲自東南至西南而墜正
德元年三月戊申夜太原有火如斗大墜寧化王殿前
廣寧整臺火發旗杆凡六七月壬戌夜火光墜即墨民

家化為綠石員高尺餘七年三月丁卯夜大風雷電餘
千仙居寨有光如箭墜旗竿上俄如燭龍光照四野士
卒撼其旗飛上竿首既而其火四散鎗首皆有光如星
十二年五月己亥夜火隕都察院獄旋轉久之始滅十
五年六月癸未夜台州火隕三大如盤觸草木皆焦嘉
靖五年七月甲申有火毬三大五六尺從北墜於東其
光燭天二十年七月丙戌火毬如斗隕左軍都督府中
門東良久乃滅隆慶二年三月戊午延綏保寧堡城角

旗杆出火灼灼有聲萬曆十四年保定府民間牆壁內
出火三日夜乃熄十五年二月綏靖邊城各堡春獸旗
杆俱出火軍士以杖撲之杖亦生火三更乃熄二十年
二月陝西空中有火大如盆後生三尾隕於西北二十
一年二月庚辰夜分大毛山樓上各獸吻俱有火如雞
卵赤色即時雨雪火上嗟嗟有聲二十三年九月癸巳
役永寧有火光形如屋大隕於西北永昌鎮番寧遠所
凡同二十四年二月戊申夜鄠縣雷雨徧地火光十有

餘里二十五年二月癸亥平涼瓦獸口出火水灌不滅
八月甲申肅涼二州火光在天形如車輪尾分三股約
長三丈天啟六年五月壬寅朔厚載門火神廟紅毬滾
出前門城樓角有數千螢火并合如車輪崇禎元年西
安有火如碾如斗者數十色青燄高尺許嘗入民居留
數日乃去用羊豕讓之不為害自五月至七月而止十
三年六月壬申綏安火如斗自西墜地土木皆焦
赤青赤祥成化十三年二月甲午浙江山陰湧泉如血

正德元年正月乙酉夜崇明空中有紅光曳尾如虹起
東北至西南沒聲如雷辛丑鳳陽紅光發與日同色聲
如雷二年八月己亥赤光見寧夏長五丈八年七月甲
申龍泉有赤彈二自空墮於縣治形如鵝卵躍入民居
相鬪久之嘉靖三十三年四月戊子慈谿民家湧血高
尺餘三十七年五月戊辰東陽民張思齊家地裂五六
處出血如線高尺許血凝夫就食之掘地無所見三十
九年二月己未竹溪民家出血隆慶六年閏二月癸酉

遼東赤風揚塵蔽天萬曆六年七月丁丑松門衛金鑄
家湧血三尺有聲十三年四月乙丑虹民王祿投宿姚
壘家見血出於地驚走至市市亦流血鄉人繫器物譟
之乃止十九年六月庚戌慈谿茅家浦湧血八處大如
盆高尺許血濺船舫即出血濺人足足亦出血數刻乃
絕二十六年九月甲辰蕭山賈九經家出血高尺許天
啟元年六月庚寅肇慶民王體積中庭噴血如跑突泉
崇禎七年二月戊午海豐雨血八年八月戊寅宣城池

中出血

洪範曰木曰曲直木不曲直則失其性矣前史多以恒雨狂人服妖雞禍鼠孽木冰木妖青瞿青祥皆屬之木今從之

恒雨洪武十三年七月海康大雨壞縣治二十三年十一月山東二十九州縣久雨傷麥禾建文元年三月乙卯夜燕王營於蘓家橋大雨平地水三尺及王卧榻永樂元年三月京師霪雨壞城西南隅五十餘丈七月建

寧衛靈雨壞城二年七月新安衛靈雨壞城八月靈雨
壞北京城五千餘丈六年七月思明靈雨壞城七年九
月浙江衛所五颶風驟雨壞城漂流房舍八年七月金
鄉衛颶風驟雨壞城垣公解十二年九月密雲後衛靈
雨壞城二十年正月信豐雨水壞城瞿城衛如之二十
一年二月六安衛靈雨壞城是歲建昌守禦所淮安懷
來等衛皆靈雨壞城二十二年二月壽州衛雨水壞城
三月贛州振武二衛雨水壞城四月靈雨壞密雲及薊

州城是歲南北畿山東州縣靈雨傷麥禾甚衆洪熙元年夏蘓松嘉湖積雨傷稼閏七月京師大雨壞正陽齊化順成等門城垣九月久雨壞密雲中衛城宣德元年五月永嘉樂清颶風急雨壞公廨廟宇及壇廟正統元年七月順天山東河南廣東靈雨傷稼四年夏居庸關及定州衛靈雨壞城五年二月南京大風雨壞北上門眷覆官民舟七年濟南青菜淮鳳徐州五月至六月靈雨傷稼九年閏七月野狐嶺等處靈雨壞城及濠塹墩

臺十一年春江西數府十六縣靈雨田禾滄沒十二年
六月瑞金靈雨市水丈餘漂倉庫溺死二百餘人十三
年四月雨水壞順天古北口邊倉五月至六月鳳陽徽
州久雨傷稼九月寧都大雨壞城郭廬舍溺死甚衆景
泰三年永平兗州久雨傷禾大蒿等二十衛所久雨壞
城四年南畿河南山東府十州一自五月至於八月靈
雨傷稼五年杭嘉湖大雨傷苗六旬不止七月京師久
雨九門城垣多壞六年北畿府五河南府二久雨傷稼

雲南大理諸府如之七年兩畿江西河南浙江山東山
西湖廣共府三十恒雨滄田天順元年濟兗青三府大
雨閱月禾盡沒四年安慶南陽雨自五月至七月滄禾
苗七年五月淮鳳揚徐大雨腐二麥武昌漢陽荊州廬
舍漂沒民皆依山路宿成化元年六月畿東大雨水壞
山海關永平薊州遵化城堡八月通州大雨壞城及運
倉二年定州積雨壞城垣及墩臺堞口百七十三八年
七月南京大風雨壞天地壇孝陵廟宇鳳陽大雨壞皇

陵牆垣九年三月南京大雨水拔太廟社稷壇樹十三年七月京城大雨十四年八月鳳陽大雨沒城內民居以千計十七年七月乙酉南京大風雨社稷壇及太廟殿宇皆摧十八年河南懷慶諸府夏秋靈雨三月塌城垣千一百八十餘丈漂公署壇廟民居三十一萬四千間有奇渰死一萬一千八百餘人弘治二年七月京師靈雨求直言三年七月南京驟雨壞午門西城垣七年七月庚寅南京大風雨壞殿宇城樓獸吻拔太廟天地

社稷壇及孝陵樹自五月至八月義州等衛連雨害稼
八年五月南京陰雨踰月壞朝陽門北城垣九月潮州
諸府颶風暴雨壞城垣廬舍十年七月安陸靈雨壞城
郭廬舍殆盡十一年七月長安嶺暴風雨壞城及廬舍
十四年六月義錦廣寧靈雨壞城垣墩堡倉庫橋梁民
多壓死者十五年六七月南京大風雨孝陵神宮監及
懿文陵樹木橋梁牆垣多摧拔者十六年五月榆林大
風雨毀子城垣移垣洞於其南五十步十八年三月雙

山堡大雷雨壞城六月至八月京畿連雨正德元年七月鳳陽諸府大雨平地水深丈五尺沒居民五百餘家二年七月武平大風雨毀城樓長泰南靖大風雨三日夜平地水深二丈漂民居八百餘家十二年蘓松常鎮嘉湖大雨殺麥禾十三年應天蘓松常鎮揚大雨彌月漂室廬人畜無算十六年京師久雨傷稼嘉靖四年六月登州大雨壞城十六年京師雨自夏及秋不絕房屋傾倒軍民多壓死二十五年二月京師大雨壞九門城

垣三十三年六月京師大雨平地水數尺四十五年九月鄖陽大霖雨平地水丈餘壞城垣廬舍人民溺死無算隆慶元年六月京師霖雨遼東自五月至七月雨不止壞垣牆禾黍萬厯元年七月霖雨十一年四月承天大雨水十二年正月喜峰口大風雨壞各墩臺十五年五月至七月蘓松諸府霖雨禾麥俱傷六月京師大雨二十四年杭嘉湖霖雨傷苗二十八年七月興化莆田連江福安大雨數日夜城垣橋梁隄岸俱圯二十九年

春夏蘓松嘉湖靈雨傷麥三十二年七月京師靈雨城崩三十三年五月丙申鳳陽大風雨損皇陵正殿御座三十九年春河南大雨夏京師廣東大雨廣西積雨五月閏月四十二年浙江靈雨為災天啟六年閏六月大雨連旬壞天壽山神路都城橋梁是歲遼東靈雨壞山海關內外城垣軍民傷者甚衆七年山東州縣二十有八積雨傷禾崇禎五年六月大雨八月又雨衝損慶陵九月順天二十七縣靈雨害稼十一年夏雨決旬圯南山

邊垣十二年十二月浙江靈雨阡陌成巨浸十三年四月至七月寧池諸郡靈雨田半為壑十五年十月黃蘄德安諸郡縣靈雨十六年二月戊辰親祀社稷大風雨僅成禮而還

狂人景泰三年五月癸巳朔以明日立太子具香亭於奉天門有一人自外竟入執紅棍擊香亭曰先打東方甲乙木嘉靖十八年駕將南幸有軍人孫堂從御路中橋至奉天門下登金臺坐久守門官役無知者升堂大

呼覺而捕之乃病狂者

服妖正德元年婦女多用珠結蓋頭謂之嬰珞十三年正月車駕還京令朝臣用曳撒大帽鷹帶給事中朱鳴陽言曳撒大帽行役所用非見君服皆近服妖也十五年十二月帝平宸濠還京俘從逆者及懸諸逆首於竿皆標以白幟數里皆白時帝已不豫見者識其不祥崇禎時朝臣好以紗縠竹籜為帶取其便易服者謂金銀重而貴紗籜賤而輕殆賤將乘貴也時北方小民製情

低側其簷自掩眉目名曰不認親其後寇亂民散途遇親戚有飲泣不敢言或掉臂去之者

雞禍弘治十四年華容民劉福家雞雛三足十七年六月崇明民顧孟文家雞生雛猴足而人形身長四寸有尾活動無聲嘉靖四年長垣民王憲家雞抱卵內成人形耳目口鼻四肢皆具萬曆二十二年六月靖邊營軍家雌雞化為雄崇禎九年淮安民家牝雞啼躍化為雄十年宣武門外民家白雞喙距純赤重四十斤或曰此

鷺也所見之處國七十四年太倉衛指揮善周輔家雞
伏子兩頭四翼八足

鼠妖萬歷四十四年七月常鎮淮揚諸郡土鼠千萬成
羣夜啣尾渡江絡繹不絕幾一月方止四十五年五月
南京有鼠萬餘啣尾渡江食禾稼崇禎七年寧夏鼠十
餘萬啣尾食苗十二年黃州鼠食禾渡江五六日不絕
時內殿奏章房多鼠盜食與人相觸而不畏亦鼠妖也
至甲申元旦後鼠始屏跡又秦州關山中鼠化鶴鶉者

以數千計十五年二月羣鼠渡江晝夜不絕十月榆林
定邊諸堡鼠生蝦蟆腹中一生數十食苗如割

木冰洪武四年正月戊申木冰六年十二月乙丑雨木
冰十一年正月丁亥雨木冰二十二年正月甲戌雨木
冰正統三年十月丁丑曉木介天順七年十月甲辰雨
木冰八年正月乙丑雨木冰成化十六年正月辛卯曉
雨木冰二十三年十二月戊辰曉木介隆慶三年十一
月癸巳木冰萬曆十四年冬蘓松木冰崇禎元年十一

月陝西木冰樹枝盡折其後大河以北歲有此異

木妖弘治八年長沙楓生李實黃蓮生黃瓜九年三月
長寧楠生蓮花李生豆莢嘉靖三十七年十月戊辰泗
水沙中湧出大木木圍丈五尺長六丈餘隆慶五年四
月杭州栗生桃萬曆十八年五月丁卯祖陵大松樹孔
中吐火竟日方滅二十三年十二月癸亥皇陵樹顛火
出延燒草木天啓六年四月癸巳白露著樹如垂綿日
中不散十月辛酉南京西華門內有烟無火禮臣往視

乃舊宮材木瘞土中久烟自生土石皆焦以水沃之三日始滅崇禎六年五月癸巳霍山縣有木甌飛墜不知所自來七年二月丁巳太康門杜自開者三知縣集邑

紳議其南梁墮而死

青魯肅禘宣德元年八月辛巳東南天有青氣狀如人

叉手揖拜

明史卷二十九